

FSSK UMS anjur Simposium Kebangsaan Isu Sains Sosial dan Kemanusiaan 2022

UB 11.03.2022 P.08

KOTA KINABALU: Fakulti Sains Sosial dan Kemanusiaan (FSSK) Universiti Malaysia Sabah (UMS) telah berjaya menganjurkan Simposium Kebangsaan Isu Sains Sosial dan Kemanusiaan 2022 (ISSK2022) secara maya, kelmarin.

Dekan FSSK, Profesor Madya Dr. Asmady Idris berkata, penganjuran simposium yang julung kali diadakan itu membawa tema 'Pandemik COVID-19: Adaptasi dan Hala Tuju' dengan mengangkat isu yang banyak mempengaruhi kehidupan masyarakat dunia.

Justeru katanya, penganjuran simposium tersebut amat bertepatan dengan usaha masyarakat dunia khususnya Malaysia yang sedang dalam usaha beradaptasi dan mencari hala tuju terbaik mendepani COVID-19.

"Norma baharu yang wujud dalam masyarakat Malaysia seperti penjarakan fizikal,

pemakaian pelitup muka dan kerap membasuh tangan perlu dinaturalisasikan demi menyekat penularan wabak ini.

"Dari segi ekonomi, ia turut menyaksikan norma baharu dalam pekerjaan iaitu bekerja dari rumah dan norma yang sama berlaku terhadap pengajaran dan pembelajaran di semua institusi pendidikan," katanya.

Tambah beliau, berdasarkan laporan oleh Pertubuhan Buruh Antarabangsa (ILO), COVID-19 dipercayai telah memberi kesan serius kepada dunia pekerjaan dari segi kuantiti dan kualiti kerja secara global.

"Sehubungan itu, besarlah harapan saya agar simposium ini mampu menjadi wacana para penyelidik universiti awam dan NGO untuk berkongsi penemuan terkini tentang kajian mereka berhubung adaptasi dan hala tuju kita dalam berhadapan

kehidupan pasca COVID-19," katanya.

Seramai 103 peserta yang terdiri daripada para penyelidik UMS, Universiti Teknologi MARA (UiTM), Universiti Tun Hussein Onn (UTHM), Universiti Sains Malaysia dan Institute for Development Studies (IDS) Sabah menyertai ISSK2022 yang merangkumi 19 kertas kerja berkaitan COVID-19 dan Komunikasi; COVID-19 dan Dunia Kerja Baharu; COVID-19 dan Pendidikan; COVID-19 dan Luar Bandar; serta COVID-19 dan Hubungan Antarabangsa.

Turut hadir sebagai pengu-captama ialah Ketua Pegawai Eksekutif IDS, Profesor Madya Ts. Dr. Ramzah Dambul dan Pengarah Pusat Keselamatan dan Kesihatan Pekerjaan UMS, Profesor Dr. Khamisah Awang Lukman serta Pengerusi ISSK2022, Profesor Madya Dr. Dzuri-zah Ibrahim.



AMANAT: Dr. Asmady ketika berucap merasmikan simposium maya ISSK2022.